

Visoki predstavnik dao iskaz kao svjedok optužbe pred Haškim tribunalom

Visoki predstavnik, Paddy Ashdown, je u srijedu prezentirao dokaze pred Međunarodnim krivičnim sudom za ratne zločine u Hagu, u predmetu protiv Radoslava Brđanina i Momira Talića. Kao svjedok optužbe, Visoki predstavnik je opisao svoje posjete logorima Manjača i Trnopolje početkom avgusta 1992. godine.

Prilikom davanja iskaza pred Sudom, Visoki predstavnik je opisao "nehuman tretman" zatvorenika koji je vidio u logoru Manjača i "neopisivu bijedu" u logoru Trnopolje. On je naglasio da su zarobljenici u ovim logorima po njegovom mišljenju bili civili i rekao da je osnovni cilj njegove posjete ovim logorima bio "da zaustavi ili smanji intenzitet patnji ljudi u ratnim okolnostima, ali i da, prije svega, spasi ljudske živote." Rekao je da po njegovom mišljenju posjeta logoru Manjača "predstavlja najbolje što je ikada učinio" jer je rezultirala poboljšanjem uslova u logoru i spašavanjem ljudskih života. Međutim, Visoki predstavnik je dodao da ima osjećaj da ga "još uvijek proganjaju slike koje je vidio prilikom njegove posjete logoru Trnopolje" i napomenuo: "Da smo bili u mogućnosti da učinimo više možda bi bili spašeni životi onih koji su kasnije ubijeni".

Visoki predstavnik je rekao da je svojom posjetom ovim logorima želio da skrene pažnju međunarodne zajednice na ono što se u ovim logorima dešavalo i da osigura pristup Crvenog krsta/križa i drugih humanitarnih organizacija ovim logorima.